

# De Kwaluel

PRINS RICK I  
PRINSES JORETH

CV de Moerebuuk  
Jaorgank 54




JEUGDPRINS KRIS EN  
JEUGDPRINSES ROSE

Vastelaovendj 2019

# De Kwakel Proclamatie

CV DE MOEREBUUK  
Jaorgank 54



Ich, prins Rick 1e, 68ste prins vanne Moerebuuk.

Gebore op 10 november in Wieërt, 9 maondj nao de Vastelaovendj van 1990.

Opgegruudj in ... Itervoort ... as jóngste telg in 't Èller gezin van aod-prins Theo van Toon van Aere Drees en Jeanne van Tjeu van Hoke Door én nateurlik miene aojere broor Bram. Gelökkig oeteindelik toch verhoestj nao Èll en dao begos 't fieëst pas echt!

Ich deil mien vastelaovesblood same mèt mien prinses Joreth, van Hover. Dao woeën ich sinds kort mèt same aan 't Scheijmansplein. Wae zeen allebei actief in 't óngerwies. Ichzelf wèrk op 'n speciaal sjoeël, de Maaskei in Hael, woeë ich die jeugd get bie probeer te bringe.

Mien adjudante Bram, Gert-Jan en Noud en de dames Sandra, Li en Fé wore al bekindj véür det se mich kwome vraoge as prins, det haje wae namelik allang ieëre besproke.

Same mèt al dees persoeëne bén ich zeer actief in 't vereinigingslaeve van Èll. Zoeë zeen wae gaer aanwezig op de Bontje Aovendj as '3 Kieér Niks'. Daonaeve bén ich actief as: bestuurslid van 't KVW, lid van 't Jeugd Comité, Tambour-maître vanne sjötterie, spoeëk bie Stichting Spook én ... verdediger bie 't vlaggesjeep van RKESV: 't Derdje (... oh jao, en in miene vrieje tied studeer ich ouch nog).

Bie de gratie van Groetvorst Jan, Vorst Henri en de Raod van Elf wil ich uch 't volgendje dudelik make:

- Miene droum óm prins te waere mèt deze fantastische groep óm mich haer is werkelikheid gewore.
- Wae zulle d'r same mèt jeugdprins Kris en jeugdprinses Rose, heur adjudante Max en Benthe en de jeugdraad volle bak tegenaan gaon.
- Ditzelfdjie gaon wae nateurlik ouch doon mèt die men en de dames vanne Raod van 11.
- Ich bén eine groeëte fan van blaosmeziek en wil dan ouch gaer vraoge veur muzikale óngersteuning van al ós Èller muzikante.
- Vrinjegroep Spieje heet bie deze heur ieëste prinses en ouch de Prutsers zeen wederom vertegewoordingdj. Wae verwachte den ouch det dees twieë groepe dit jaor 'n stepke extra zètte.
- Laote wae daonaeve ouch de aandacht gaeve aan de jubilerendje Vervaelers, die dit jaor speciaal veur ós nog eine kieér 'ne groeëte wage bouwe.
- 3 Kieér Niks duit dit jaor trouwes ouch veur 't ieëst mèt mèt 'ne groeëte wage, cóncurrentie dus!
- Vanaaf noe weurtj 't Scheijmansplein 't Prinselein genumdj en ich hoop det dit hieëlemaol verseerdj geit waere.
- Dit allemaal zoeëdet wae same Vastelaovendj kónne gaon vere mèt alle Moerebuuk en daodoor dees geweldjige traditie in standj haoje. Ich regeer dees daag den ouch ...

## VEUR JÓNK EN AOD!

*Maaktj plezeer, genietj d'rvan en ónthaotj:  
Veur Jónk of Aod, det is mich óm 't aeve,  
same gaon wae hie fieëst belaeve!*

Leef Moerebuuk,

Èll, december 2018

't Waas de woonsdig nao de kermis, tied veur de KVW-vergadering. D'r wore get minse zeek, dus 't waas geine late. Ich stóng nét trök oppe studeerkamer bie Joreth, wie óm 22:15 oor de bel ónger nog ging. Van ós bel sjrikse dich al gauw kepot, mer dit waas anges. Wie ich veurzichtig ózze intercom oppakdj, huuerdje ich de stum van Pieter; "Bès se allein?". Nao mien antwoord "Jao, mèt Joreth" kóste wae hum drèk binnelaote ... toen wiste wae zat! Mèt 't hert inne kael höbbe wae same mèt Pieter alles op 'n rieke gezatte, is dit waal te combinere mèt de studies ... ? Det mótt den mer, wae gaon 't doon!

Nao waeke van veurbereidinge en geheimzinnig gedoons mèt ós kei-enthusiaste gevolg, zeen wae d'r noe hieëlemaol klaor veur en höbbe d'r zin in. Nog efkes de Kerst verbie en den is 't zoeë wiet.

Ich wins ederein, jónk en aod, 'ne geweldjige vastelaovestied toe ... genietj d'rvan!!

**ALAAF!  
Prins Rick 1**





## Det doordje lang

Siem haaj al 'ne hieéle tied neet mieér in ziene auto gereje. Ederein dacht det det dink kepot waas, mer hae haaj de sleutel in 't boetelandj in 'n hotel laote ligge. Wie ze hum dae opgesteurdj haje kost d'r weer róndjcrosse. Jaomer, want hae kreeg net get cóndisie van 't fietse.



## Bruuedjes

't Derdje waerdje veurig seisoen kampioen en ze veerdje det tot in de late eurkes bie Siem. Get werm vleis op ein bruuedje, det geit d'r altied waal in. D'r bleve get bruuedjes euver. Rick Camp woeëj die waal gaer mètpakke veur 'mörrevreug' en stopte ze inne voetbaltas. Nao de zomerstop, bie aanvang van 't seisoen, bleke die bruuedjes nog steeds inne tas van Rick te zitte. Inmiddels leek 't of d'r greune pesto op gezaete haaj. Noe rook t'r neet allein zien voetbalsjoon.



## Vreentjelik trökzweie

Conny van Peter kwoom trök vanne kapper in Hunsel. Oppe Hoeëgstraot sting ein pliesiaafzètting en eine plies stook zien handj op, woeë-op Conny netjes trök zweitj en 't pedaal nog get deper intraptj. Ein paar hóngerd maeter verder keek ze inne spiegel en stóng d'r "Stop politie" op 'n sjerm. 't Bleek toch óm ein stopteiken te gaon.



## TE KOUP!

Wis djer al ...

- det Mia van Piet van Roij hieël good is mèt 't neimesjian
- det ze de moeëre neitj die gae mèt de vastalaovendj euveral ane gevels zeetj hange
- det gae bie Mia op Seringestraot 9 terecht kóntj, as gae ouch zón moeér wiltj höbbe.



## BA mèt zónger baard

Mart vreugtj oppe ieëste oefenaovendj aan Emiel woeéróm hae ziene baard aaf heet gesjore. Miel zeet det ziene baard te lank waas veur de Bontje Aovendj. "Ich höb 'm aafgesjore zoeëdet hae tiejes de BA precies de goojingdjé heet." Mart vreugtj ouch aan Sjoerd of hae ziene baard heet aafgesjore óm ein goojingdjé te höbbe tiejes de veurstellinge. "Nae," zeet Sjoerd, "ich waas vergaete 't kepke oppe tondeus te zètte, inins haaj ich ein kaal streep op mien gezicht".



# De Kwakel

Loonbedrijf  
**v.d. Looij B.V.**  
Tel. 0495-551 445

CV DE MOEREBUUK  
Jaorgank 54



## aMay!

May haaj aafgesproke mèt 'n vriendin óm te gaon zwumme. Mèt veul zin sjeurdjé ze 't dörp oet op Wieërt aan. Neet veul later kwaam ze 'Speedy' trök óm toch mer heur zwumpak te hole. Jeh, niks tege May, mer mesjien toch baeter.



## WAAT 'N GE-UMMER!!



Mariëlle haaj op Pinterest get leuks gezeen: cementveut make veur 'ne decoratieve paol. Sjan vónj det 'n leuk idee en vroog of die det veur heur fieëst ouch woeëj make. Det woeëj Mariëlle waal doon en Rianne kwaam helpe, ze haje allein nog 'ne bössel ummers nuuedig. Sjan regeldje zón 30 ummers en zoeëj die bie Mariëlle aafgaeve veurdet ze nao Pinkpop ging. Einmaol in Landgraaf oppe camping zaag Sjan det se get vergaete waas: de ummers stinge nog inné bus. Óm snachts neet de nek te braeke euver die dinger, waerdje die naeve de groeëte bus gezatte. Ederskieér as ze d'r langsleip waerdje gojedaag gezagdj tege de ummers en d'r waerdje gezellig gefieëstj. Op maondjig keek ze trök op ein geslaagdj muziekweekend en ging ze tevreje op heives aan.

Wie Mariëlle en Rianne wiejer meindje te gaon mèt 't project, waas d'r ein klein minpuntje: de ummers die stinge nog, jaowaal ... in Landgraaf oppe camping!!!



### Waat gebeurtj d'r op dees foto?

- A) Mins hoektj zich as de bus naeve kumtj
- B) Mins sjaamtj zich, det d'r de bus nao Hunsel mot höbbe
- C) Mins ruuktj zien scheetje
- D) Mins zeuktj lens



## Smeets Steyvers

schildersbedrijf

Sjaak Smeets	Erwin Steyvers
Breederkamp 13	Graswinkellaan 151
6011 SR EII	6005 KE Weert

06 1221 5102

06 1138 0755

E-mail: [info@devakschilders.nl](mailto:info@devakschilders.nl)

[www.schildersbedrijfsmeetssteyvers.nl](http://www.schildersbedrijfsmeetssteyvers.nl)



## Zwarte Cross

Joeri waas mèt zien vrinj nao de Zwarte Cross gewaestj. Det is ein groeët fieëst woeë neet zoeë nauw gekeke weurtj. Wie d'r weer thoes kwaam, waas de auto van binne en van boete 'ne verkesstal. "Kóm," zeet vader Twan, "wae gaon d'r mèt nao de wasserette." Ze kochte 'n kaertje en ginge mèt de wage in de rie staon. Óngertösse det ze móste wachte, ginge ze alvast de auto get oetmèste. Wie ze aan de beurt wore, waas 't kaertje kwiet. Twan en Joeri begoste drek dao-euver te steggele. "Det kaertje liktj inne auto, kiek 'ns tegooj oet dien döp," zagt Twan. "Jeh," zeet Joeri, "den liktj 't noe inné voelnisbak."

En toen kost vader Twan de hieële voelnisbak leeg gaon hole en jaowaal, 't kaertje laag óngerin. Nao flink get opónthaod waas de wage oeteindelik zuver en koste de anger minse ouch weer veuroet. In de auto op Èll aan bleef 't nog effe ónröstig.



4



## In 't geheim...

Angelique van Ard zitj in 't jeugdcomité.

Zoeë mótté d'r eder jaor veur de vastelaovendj foto's waere gemaaktj van 't jeugdprinsepaar. Angelique wiltj det de kinjer d'r tip-top opstaon, mèt ein ster óm en mèt heure eige naam. Dees sterre waere in 't geheim gegraveerdj in Beul. Wie Angelique ze ging ophole vreugtj de verkoupster achter de balie: "Num se dae vanne groeëte Prins ouch innegang mèt?" Angelique heet effe getwiefeldj.

## Bloeëte madam

De manne van ASK wore op euvernachtig in Belsj, en ginge lekker aete in ein deftig restaurant.

Niels zoot al de hieële aovendj te video belle mèt zien noew vlam. De ober kwoom nao de taofel en zagt: "Awel meneer. Ge weet dat ge op restaurant zit?" "Oh jao," zeet Niels, "maar ik doe toch heel zachtjes ..." "Amai meneer, dat is waar, maar die madam op uwen telefoon is zich aan het uitkleden!"



## 'n Noew spelke

Tonny haaj zich veur boete oppe televisie weer een noew spelke aangeschaftj, namelijk bowle. Anouk ging boëëdsjappe doon. Wie ze trök kwaam, sting Duuk te wieze ane sjötting. "Woeë is papa?" vroog Anouk. "Ich bèn hie," zeet Tonny vanoet de tuin van Len en Geer en kroop weer trök euver de sjötting. "Ich waas aan 't bowle mèt de aafstandjbedening en ich woor get té enthousiat!"



## Wisj djer al ...

- det Yvon van Logtestijn de bruuedjes veur de wanjetocht inne diepvries haaj zitte
- det ze die vergoot oet te pakke en ze die toen smörges al oppetied de inne auto lagt mèt de verwerming vol ope
- det heure wage veul wèghaaj van eine dampendje ove, wie ze oppe pauzeplaats aan kwaam rieje
- det de bruuedjes nog steeds neet gans óntdoeëdj wore.

## DREIGINGSNIVEAU HOEËG OP FACEBOOK

Iris Crommetuijn en heure vreendj Bart T. ginge op reis.

De bestumming waas Israël. 't Waas ein geweldjige reis en ze genote volop. Zoeë wie det tegewoordig gebroekelik is, woeëje ze det deile mèt de minse die neet mèt heur mèt wore op vakantie, dus zatte ze get foto's op Facebook. Jim B. oet Èll reageerdje dao-op: "Free Palestina!" Smörges waerdje Bart toen van zien bed gelichtj door medewerkers van de Nederlandse Ambassade in Tel Aviv en veer oor lang óngervraogdj. Die woeëje wete waat zien bedoelinge wore in Israël, waat veur connecties det hae haaj en waat dae 'Jim B.' bedoeldje mèt zien reactie ónger de foto. Gelökkig bleek Bart hieël braaf en óngevaorlik dus lete ze hum weer gaon. Dit verhaol is nateurlik neet waor, mer Bart heet det Jim waal zoeë wies gemaaktj. Jim heet toen ein waek sjrik gadj det ze hum 'ouch' kwome oppakke.

# De Kwakel



## Dagobert Duck

't Haaj get aan, mer begin veurig jaor waas 't den zoeëwiet: Èll haaj weer eine pinautomaat. In dae tied haaj Siem nog café en Joost vroog aan Siem of hae 100 euro mocht pinne. "Loup mer nao 't plein, dao stoit d'r weer eine" kreeg t'r te huuere. Effe later kumtj d'r breid lachendj weer trök binne. "Siem, doot d'r eine van mich! Ich höb de jackpot! Ich pindje hóngerd euro, mer kreeg d'r doezendj!" Ein puueske later zeet eine: "det kan toch neet, det zal toch echt waal van dien raekening aaf zeen." Mer Joost bleef d'r bie, hae haaj 100 gepintj en 1000 gekrege. Ein foutje vanne bank in zien veurdeil. Hae haaj flink gelök gadj. Wie hae oeteindelik toch ins zien banksaldo bekeek, bleek dao echt 1000 aafgesjreve te zeen.

Noe snappe wae woeëróm det Joostinne optocht Dagobert Duck mocht zeen.



# De Kwakel

## OPTOCHT OETSLEEG:

1 Wie van de drie 118,5 Mia Geelen



### KLEIN GROEPE

1 Vastelaovends storm  
2 Vastelaovendj super vet!  
2 Knauwelpries

1 Oetgebreijdj  
2 Drie Wiesse  
3 Hangouderen

133,5 De Plekkers  
130,5 Golden Girls  
128 Coupe Troep

### INDIVIDUEEL



### GROEËTE GROEPE

1 Wae strippe de optocht  
2 Bouwvakkers /Grof geschut  
3 Tösse sterre en maon .....

150,5 De Vervaelers  
134 Dullgedreijdj  
133,5 Foetelieërs



### WAGES



### WICHTER OPTOCHT





## 'n Deur bel

Sandra van Bram ging bie buurvrouw Wendy oppe koffie. Die haaj ein noew deurbel. Super dink en neet te deur bestèldj bie eine Chinese online winkel. Sandra kwoom thoes ein woeëj ouch zoeën bel. Ein paar daag later waerdje ze geleverd. Toch bleek dit geine goje aankoup te zeen. Woeë des se ouch oppe bel duudjes, alle óntvangers ginge aaf. Waerdje bie Wendy aangebeldj, den deej ouch Sandra de veurdeur ope. En angersóm. Sandra heet toen toch mer weer ein anger bel gekochtj.

## Met 't grut op stap

Chrissy woor d'r klaor veur óm heur ieëste uitje te make mèt heur twieë wichter. Ze haaj alles inne wage gelaje óm op weeg te gaon. Kinjer d'r in? Check! Tasse bie mich? Check! ... Den kónne wae gaon. Blie det ze op tied op de plaats van bestumming waas bedacht ze zich in eine kieér det ze heur portemonnee en telefoon "effe" op 't daak van de wage haaj gelagdj. En jeh, die wore neet blieve ligge tiejes de rit.

Alles aafgezóchtj, mer gelökkig heet de ieërlíkke vinjer zich gemeldj. Via rouksignalen of via de postdoef, dét is nog óndudelik.



## Haastige spoed is zeldje..

Huub zoeëj veur de prieze zörge veur de kinjeroptocht. Dao dacht hae get laat aan, mer gelökkig kóns se veul mèt internet tegewoordig. Vriedigs veur de vastelaovendj lieëtj hae de bestèlling aaflevere bie Mariëlle. Zunjigs, mèt foto's make bie de Prins, vreugtj Mariëlle, of alle bestèldje bekers in de doeës zitte. Ze haaj zelf nog neet dörve kieke. "Jao, op zich waal," zeet Huub, "allein staon op alle 2e prieze 'ne jogger aafgebieëldj."

## DE MOEL HAOJE

Mèt de prinserceptie kwaam de aanhang van de adjudantes 't podium op óm Prins Wies ein hendje te gaeve. Vorst Henri vreugtj aan de men of ze mesjen ein weurdje wille spraake. "Nae," zeet Wil, "thoes höbbe wae ouch niks te zègge."




## MIJN BUURT MIJN SPAR



## ZWART-WIT

Tonny, oftewaal op dinsdigaovendj 'Witte Tonny', zoeëj dit jaor de Hieëpe waal es 'n witte laog schmink en lippestift bezörge. Die haje det namelik tegooj nao zien prinsejaor. Toen höbbe de Hieëpe hum 'n laog zwarte lippestift bezördj. In de gooij kamer zitj Tonny mèt schmink en spunkses te kloeëte. Op ein of anger maneer paktj 't spunkske de schmink neet op, d'r weurtj nog neet völ wit. Angelique van Ard kiektj 't aan en zeet: "Tonny, as se det plastic besjermläogske d'r aaf tréks, geit 't mesjen völ baeter."



# De Kwakel

## Kóns se tèlle ?



Veul minse speule van kleins aaf aan voetbal. Zeeën doorlops se de jeugd en speul se dèk nog bëst ein aantal jaor bie ein senioreteam, veurdet se de respectabele laeftied bereiks óm bie de veterane aan te moge traeje. Dit team waertj ouch waal RKESV 35+ genumdj,

geduidj op voetballers die 35 jaor en aojer zeen. Bo (Tunissen) volgtj de oetsleeg op de Voetbal-app. Toch vroog ze zich aaf wie

't kost det de veteraneteams aangeduidj waere met 35+1 en 35+2 in plaats van 36 en 37. Inmiddels is ze d'r achter det dees aanduiding niks mèt ein sumke te make heet, mer mèt 't versjil tösse 't 1e en 't 2e veterane team.

## Teveul van 't goje

In juni waas Èll ouch in 't noets mèt de tekst: "Dronken fietser kruipt door oog van de naald." Oppe Hoeëgstraot (of toch Niesstraot?) haaj Danny Nies, mèt aardig get drank op, zich naeve de fiets gelagdj. Hae waas midde inne nacht ein dutje gaon doon. 'Kan neet waor zeen, det emes dae gezope heet, den nog door 't oug van ein naoldj kan kroope.



## Gewiek(s)tj bieëstje

't Waas sjoeën waer en Wilbert, dae bie de slegter wérktj, zaat thoes inne tuin te genete vanne zón, wie zien vrouw Rachel thoeskwaam. Ze waas gaon winkele en zat ein pakketje veur 'm oppe taofel nieér. Vol trots deej ze de doeës ope óm de noew aanwinst te laote kieke. Mer.. dae kanarie dae ze gekochtj haaj, bedacht zich gein moment en zocht 't drek hoeëgerop. Hae fladderdje get róndj en zat zich hoeëg in eine boum veuraan inne straat. Ze höbbe mèt de ganse buurt geprobeerdj det bieëstje oet de boum te kieke, mer tevergaefs. De vogel waas gevloge....



## Vèttige pekskes raod van 11

Nao de vastelaovendj doon de meiste leje van de raod van 11 de jas en de bóks nao de stoumerie. Den waere ze netjes zuver gemaaktj en kónne ze bie 't leedjes festival in november weer aangedaon waere. As veurzitter Harm ruum ein waek van tevereien zien pak geit ophole, zeet die winkeljuffrouw: "Dao hingtj nog ein pak, kins dich det ouch mètnumme?" "Ich weit neet van weem det pak is, mer euver ein waek heet t'r 't nuuedig bie Ellaaf. Dae zal ein van dees daag waal kómme." Bienao alle leje van de raod wore aanwezig, allein Stefan en Anita wore d'r neet...



Veur eine appel en ein paer gaotj gae nao  
**fruitbedrief Moors**  
haer.



## Geine Sesamstraot

Aafgeloupe jaor wore de Olympische Wintjerspeule in PyeongChang. Det bleef neet ónogpemerktj in huize Eerkens, woëë sjansspringe, ieshockey en shorttrack 't dèk wónne van anger programma's. Teun (3 jaor), dae ouch gaer mèt woeëj kalle euver dees happening, zagt tege Sanne wie d'r nao de televisie keek: "Hey mam, det is toch die mevrouw vanne friettent?"



TT HALER 2019

De Kwakel

De TT Haler kriegtj vanwege groeët succes aafgeloupe jaor, in 2019 opnoew ein vervolg. Waat waas d'r völ belangstèlling bie de opening van 't TT-treffe op 't plein in Èll en op de TT-daag in Haler. Pakwèg 300 vriewilligers höbbe zo'n dikke 2700 oor heur energie gegaeve.

De vergunning 2019 is al aangevraogdj en d'r is ein plan mèt weer get noew ideeje. Ouch versjillendje Èller vereiniginge höbbe mètgewirkjt. De minse van de 'Oldtimers Club Haler' zeen blie mèt al die hulp vanne vereiniginge en vriewilligers. Dus op nao de Classic-TT van 2019 op 19-20-21 juli. Tot den en alvast hieël veul dank aan alle helpers van dit evenement.

Stichting Oldtimers Club Haler, Wim en Huub



## Wichterkal

Róndjóm Sinterklaos is d'r altied weer discussie euver de kleur van de zwarte Piete. Bie huize Rietjens is det totaal neet aan de orde, want Gijs (2 jaor) wètj 't zeker: hae heet twieë zwarte Tiete gezeen!



Sofie Custers (3 jaor) huertj pap zègge det snachs de klok waerdj verzatte. "Mer woeë zètte ze de klok den nieér? En wie kómme ze den binne?"



Lien Kessels (2 jaor) speultj gaer doktertje en duit nik lever den emes óngerzeuke. Zee móst Anouk d'r ouch aan geluive. Lien paktj de thermomaeter en Anouk duit heure móndj ope. "Jeh nae," zeet Lien "det mótt in de bille." "Toch neet in de bille?" zeet Anouk." Lien keek hieël benepe en zagt: "Jaowaal det mótt effe."



Babs Maessen (2 jaor) kumtj bie de opvang en de juffrouw vroog: "woeë is Tess?" Babs kiektj heur verbaasdj aan, veultj aan heur klèdjé en zeet: "ich höb hieëlemaol gein tesse!"



Iets mèt: Baeter 'n gooij buur...

**Vraog:** Waat duis se as se oppe wc zits en dich kums d'r achter det 't wc papeer op is?

**Antwoord:** Den steurs se Janayah nao Renee óm 'n rol wc papeer te lieëne!



# De Kwakel

CV DE MOEREBUUK  
Jaorgank 54

## EFFE WACHTE... PIZZA!

Niels Geeraths wérktj bie Hans van Fóns en heet dèkker 'n klus in 't boetelandj. Zoeë zaat t'r 'he kieér in Belsj mèt 'n paar collega's en ze haje zin in pizza. Niels zoeëj det waal effe regele. Hae klómmeldje get op ziene telefoon, en klómmeldje nog get en hae bestèldje. 't Doordje hieël efkes, mer nao 'n half oor waerdje d'r op de kamerdeur gekloptj en 6 maol pizza Margarita aafgeleverd. "Lekker! Aete!" Neet völ later sting weer eine pizzakoerier ane deur. Weer 6 maol pizza Margarita. En drek d'rnao weer geklop. Gelökkig geine pizzaboy, mer 'n paar Belsje die 'n paar kamers verderop in 't hotel zote, dao wore ouch nog 'ns 6 pizza's Margarita aafgeleverd veur de kamer van Niels.



## DE KIP EN 'T EI VERHAOL

't Waas de waek veur vastelaovendj 2018 en nog vrie röstig in Moeërelandj. Ana waas nao de Spar gewaestj en van wiedaaf zaag ze Loes door de hoof sjravele. Wie ze korterbie kwaam, reuptj ze nao Loes: "Waat löptj dao noe? Det is een kip!" "Deh," zeet Loes "die waas mich nog neet opgevalle. Ich weit neet woeë die vanaaf kumtj, zulle wae ze mer vange?"

Det waas good, de dames gingé drek op jacht. Laot noe net oet de Magnoliastraot 'ne pliesieauto aan kómme rieje. De men bedachte zich neet en gingé drek helpe, want dao kost zoeëmer ein gevaorlikke verkieërssituatie óntstaon. Wie de hoon gevange waas, mocht ze bie Loes in de hertewei róndloupe. En 'ne naam haje ze ouch zoeë bedachtj, ómdet 't haost vastelaovendj waas kreeg die hoon de duipnaam Wies.

Nateurlik waas noe de vraog woeë Wies gebore en getoge waas. Bie euverbuerman Compeer kan ze neet wèggeloupe zeen, want dae richtj zien bieëste good aaf, die blieve netjes binne 't hèk. 't Zal Wies neet boeje, die heet 't good nao heure zin dao tösse de herte. Al snel genógt waerdje Loes verrastj wie ze smörges inne wei 'n ei zaag ligge. Loes waas drek herstikke gruuets op Wies, mer wie ze 't ei opraapdj bleek 't van plastic te zeen! "Mer potverd..." dacht Loes, "weem heet det noe weer geflikjt?" Ze keek drek of bie Compeer neet emes achter de hèk zaat te lache, mer Erwin zag later det t'r van niks wist... Nao 'n paar daag begost Wies echte eikes te lègge. Haaj ze toch 't veurbieëldj gevoldgdj? As minse aoj mik 'veur de hertjes' kómme bringe, is 't groeëtste stök veur Wies, want ze is d'r as de kippe bie!

Alle hundjes van Èll weite óngertösse ouch det Wiesinne aanval geit as 't heur neet gaajtj.

Nae, laotj Wies mer gewaere, dao kumtj veurluipig nik s aan.

*Ze is nog lang neet good veur de soep!*



## ZEUK DE II VERSJILLE

*Antjwoorde op pagina 17*



10



## Blome en 'n kadobon

De vader van José Beurskens is verhoesdj nao ein verzörgingshoses. Daoróm zoeëj José de inboedelverzekering van vader waal aafzèggje. De WA verzekering sting op dezelfdje polis, mer móst waal doorloupe. Ze kreeg hieveur eine noewe polis, mer wie dae polis oppe deurmat veel, bleek 't toch neet good aangepastj. José beltj efkes mèt de maatsjappie en ze zoeëje 't aanpassee. Neet völ later vèltj de twieëdje noewe polis inne bös. Noe zal dae waal zeen aangepastj... mer nae... dus weer gebeldj. Dit ging zoeë nog 'ne kieér. "Nou," zeet José, "noe höb ich toch waal 'n kadobón verdeendj?" Die kwaam mèt de post, ein sjoeën envelop, mer de kadobón zoot d'r neet in. Jao, echt waor... ze heet weer gebeldj en de kadobón heet ze oeteindelik gekrege, mèt 'ne bos blome.



## KÓMKÖMMERTIED



Eigelik duit Josh altied de boeëdsjappe, mer sóms kumptj 't baeter oet det Marianne det duit. Zoeë ouch dae eine zaoterdig, Josh ging met Cas nao 't voetballe en Marianne en Stijn ginge nao de Lidl. Op zaoterdig is 't dao altied drök en mèt 'ne kleuter óm dich haer wilse 't leefst zoeë snel meugelik klaor zeen. Nao 't betale waerdje de cassabón in de krat gegoeëdj en einmaol thoes kwaam die terecht oppe aanrèk. Saoves zuut Josh die bón ligge en werptj d'r 'ne snelle blik op. Huh, det is völ: 69 kómkómmers!!! Marianne versjoot d'r van wie ze 't zaag, ze haaj mer 2 kómkómmers gekochtj! 'Bedraag waas te groët óm d'r neet mèt trök te gaon, dus de volgendje daag ging ze mèt loeëd inne sjoon trök nao de winkel. Gelökkig deje ze dao neet flauw. Marianne kost zelf keze of ze 67 kómkómmers woeij of lever 't geldj!



## Wisj djer al ...

- det 't kiene aan 't verjóngje is?
- det Jeroen van Jo de Kaolder, Jesse Tunissen en Stef van Carla en Ed waekeliks kómme pauze kiene
- det ze den ouch nog kieér op kieér eine geldjpries binne sleipe.
- det De Lange van Wiel van Toeëm dèk de verwörming vanne moor mótt sjroeve
- det zien vrouw Iris jaorliks waal eine kieér de more inne kamer ein anger kleur wiltj gaeve
- det hae 't bekans meug is en d'r sjarnere op wiltj zette.
- det de struepóp inne tuin bie Prins Wies waal 4x is ómgeweidj
- det de Hieëpe dinke det Gert van Luute die pót opzéttelik heet ómgeduudj ómdet ze blie waas as de keuke vol zoot mèt dorstige, kakelendje, hóngerige Hieëpe.
- det adjudant Chantal ein toetje haaj gemaaktj veur de Prins en de adjudante
- det op det toetje kanieël móst, mer det dae euveral loog, behalve op 't toetje
- det 't mesjien sjiltj, as se de folie van 't kanieëlpótje aaf hools

**Scissors & Co**

Since 2002

HAARMODE VOOR HEM EN HAAR

0495 55 19 95

[www.scissorsenco.nl](http://www.scissorsenco.nl)



## Beurs kwiet

Eine groep dames ging fietse met Zij-actief. Zoeë ouch Lien van Sjra van Stiene. Wie ze trök wore kwaam Lien d'rachter det ze heur beurs waas verlore tösse Rooj en Èll. "Dao wore ze ane weeg aan 't werk," zeet Lien. "Det wirkvolk zitj noe shoarma te aete van mien geldj!" sjandaaldje Lien nog. Saoves beldje emes det hae ein beurs gevónje haaj. 't Waas een van die wirkluuj dae dao aan de weeg wirkdjie.



# De Kwakel

CV DE MOEREBUUK  
Jaorgank 54



**CUE**  
SUPPORT

Als gae ein gooj,  
en professionele,  
audiovisuele oplossing zeuktj,  
help ich uch gaer

Roger Creemers  
0495 - 586260 | 06 28230498

## ..sóms zitj 't tege

Ajax móst voetballe en hae vintj det sjoeën óm te zeen. Dus ging d'r mèt ein paar kammeräoj nao Amsterdam óm det live mèt te make. Ze haje oetgezocht det ze óm nege oor de trein trök móste höbbe, zoeëdet ze in Wieërt de lèste bus nao Èll koste pakke. Ruum oppetied stinge ze op 't perron te wachte oppe trein, wie hae nao de wc móst. "Det kan dalik inne trein," zagte zien vrinj, mer hae 'hooldje det mekkelik' en wèg waas t'r. Wie de trein 't station binnereej, beldje hae op óm te vraoge op welk perron det ze stinge. Amsterdam CS is bëst waal een groeët station. Wie hae mèt de roltrap bovekwaam, kost t'r nog net nao zien vrinj zweije die in de wègrijendje trein zote. "Dju, höb ich weer! Trein gemistj en miene telefoon bekans leeg en dao steit mien treinkaertje digitaal op. Niks aan te doon, det los ich dalik waal op mèt de conducteur." Mèt de telefoon inne handj, pakdje hae de ieëstvolgendje trein nao 't zuide. In Sittard waerdje Joost wakker, zónger telefoon, want dae haje ze óngerweges geklauwdj.



## Wisj djer al ...

- det d'r veul minse in Rooj euver de grens goodkoup gaon tanke
- det Jos van Lemme dit ouch meindje te doon
- det t'r toen op ein kwartere tied twieë kieér is geflitstj

## WAAT IS 'T NOE?

Micky van Beurskens haaj nao ein paar penalties numme last vanne lies en ging nao de hoesarts. Nao óngerzeuk leek det 't ging óm eine klassieke liesbreuk. Micky kost drek geholpe waere en ging ónger 't mes. Bie 't óntwake waas d'r nog get duf en haaj neet hieël mètgekrege waat d'r noe precies waas gebeurdj. Nao eine vrintjelikke broeder te höbbe gevraogdj, loos dae in 't dossier det 't neet ging óm eine liesbreuk. 't Zoeëj gaon óm ziene blinje derm, dae d'r mèt spoed oet móst. Micky vónj dit raar en vroog dit veur de zekerheid nog mer ins aan ein knappe zuster. Die kwoom op dezelfdj oetslaag oet en hae mocht heives. Hae kreeg nog get foldermateriaol mèt, euver waat te doon nao ein blinje derm operatie. De woonsdig d'rop móst hae trök nao de arts in kwestie. Dae

verbaasdje zich euver dit verhaol. Hae waas d'r zelf bie, wie ze ein vètboltje wègholdje op de dikke derm, waat op de foto vòl geleke haaj op eine liesbreuk.




## Zwartrieje

Dafne en Keti ginge in oktoeëber nao Martin Garrix, eine bekindje Nederlandse DJ dae kwaam optraeje in de RAI in Amsterdam. Ómdet de maedjes nog mer 13 zeen, gaon de moders mèt nao de groeëte stad. Liejan regeldje de treinkaertjes van Wieërt nao Amsterdam-RAI. Ómdet ze de stad in wille, mótte ze nao station Amsterdam-Centraal. Det is nog ein half oor mèt de trein. Ómdet ze ein kaertje höbbe mèt Amsterdam d'rop gaon ze gewuuen mèt de trein wiejer. Liejan vindj 't eigelik mer nik. "Waat as dae conducteur den kumtj?" vreugtj Liejan. "Jeh," zeet Rianne, "den doon wae toch of wae domme Limburgers zeen." Nao eine kieér euerstappe, zitte ze lekker te kletse inne trein en as de trein stoptj höbbe ze neet in de gate det d'r nemes mieér in de wagon zitj. "Dao kumtj de conducteur," zeet Liejan mèt eine roeëje kop en veultj al in heur tes óm heur kaertje te pakke. "Dames," zeet de conducteur, "jullie moeten uitstappen, dit is Hoofddorp, de eindbestemming van deze trein."

Timmerbedrijf - Houthandel W. STEUTEN BV

voor al uw hardhouten Kozijnen en Deuren

Timmerbedrijf - Houthandel W. Steuten BV  
Grathemerweg 49B  
6037 RN Kelpen-Oler  
Tel: 0495-652178  
Fax: 0495-651478  
Mob: 06-52000001  
www.steutenhoutenbedrijf.nl  
wsteuten@hetnet.nl  
Open van maandag t/m vrijdag van 07.00 - 17.00 uur.



## Monumentenzorg tege aafbraeke historisch poepfok

In Èll zètj de sjötterie alles op alles óm zoeë snel meuglik 'n sjoeën en representatief clublokaal te realisere. Heur veurtvarendheid weurtj echter eine voot dwars gezatte door Monumentenzorg. Dees organisatie wilt det 't bestaondje "tuuske" behaoje blieftj. Monumentenzorg probeertj de basissjoeël zoeëwiet te kriege det groep 6 of 7 't tuuske adopteertj en de kinjer lieërtj det 't vreuger hieëel normaal waas óm mèt z'n alle van dezelfde poepdooës gebroek te make. Gein wc papeer, mer ein gezèt óm dien vot aaf te vaege. Óngertösse höbbe deve de vèrf van 't tuuske d'r groeëtendeils aafgehooldj. De speciale kleur "verkesstaldeurkes greun" is zeer gewildj.



## Sóms zitj 't mèt ...

't Zitj Truu van Sjaokes en heure mins Lins ouch neet mèt. Ze höbbe planne óm te stoppe mèt 't vieë en inne wei tegeneuver Miny en Dick aod Sjaokes opnoew op te bouwe. Det waas op ein haor nao róndj, mer ze móste waal ouch de aoj hoonderkoej d'rbie betrèkke. Det waas 't lèste zichtbare feit van aod Sjaokes en de panne wore nog steeds sjoeën van kleur. Noe bliktj det dae dikbil-stier van die planne nik's aafwist en det dae zich is gaon sjore ane deur vanne hoonderkoej, die deils is ingestortj. Dao zeen d'r bie de gemeindje die bewere det Lins al mèt de oetveuring is begostj veurdet de vergunninge róndj wore. Alles liktj veurluipig stil.



## Waat zeen we op dees foto?

- A) Illegaal campere oppe Groos
- B) Concurrentie Lemmehoof
- C) Sjansbeemdjie breitj oet
- D) Geheime oetkiekpost óntwikkeling Steenebamp



## Waat gebeurtj d'r op dees foto

- A) De vlag geit oet, Nicole de Louw woeëntj op heur eige
- B) Niesgoet barstj oet zien voege
- C) Straotruzie door gein oetnuuediging housewarming
- D) Binne heet d'r emes eine laote vlege
- E) Óntvangstcomité Nikki Heijkers



## Ellske

Kritisch, sjerp en oplöttendj. Det is Ellske. Dees aoj tante duit op heur eige meneer verslaag van wat ze zoeë-al hieinne buurt heet gezeen of gehuuerdj.



# De Kwakel

## In gesprek mèt Nel Deckers

Redactie: "Nel, wae haje gedachtj aan 'n interview mèt de werkgroep senioremiddig. Veur ós bëst dich dao 't boegbieëldj van. Wae wete ouch det se jaorelang artiest woorst, op versjillendje podiums. De vraog is: *Weem heet dien talent óndèktj?*"



CV DE MOEREBUUK  
Jaorgank 54



" 't Is begostj bie 50 jaor KPJ. Dao troje Toos (van Zef vanne Slegter) en ich op as Truuj en Truuj. Gewuuuen veul name numme, kleinighede vertèlle en ederein vónj 't sjoeën ómdet t'r zelf neet genumtj waerdje. Óngevieér róndj 1975 is 't den. Daonao kwaam Lowieke vanne Vin (Lowie Voermans) en vroog of wae woeëje mètdoon ane Bontje Aovendj. Sof Steijvers kwaam d'rbie (Sof van Böskes Jan) en wae deje stökskes die hieël eenvoudig wore. Doe wist woeë 't op aan ging, doe wist waat d'r zoeëj kómme, dao ging 't op aan, dao kwaam 't op oet. Den kreeg se steeds applaus. Det gewuuene, det vónje minse sjoeën. Wae höbbe noeëts emes gekwetstj, wae haje geine óngerbókse humor, wae wore neet goof, hieël veur spelbaar. Mer wae zagte 't waal.

Toen waerdje de Bontje Aovendje te drök en kwaam 't idee óm veur de bejaarde (toen waas de naam seniore d'r nog neet) eine senioremiddig te haoje. Ich waerdje gevraogdj en zagt jao. 't Comité, det wore ouch de speulders. Wae laote de name van Luute Gert, Piet van Brunister, Mia van Bosmes (Van Frits Sentjens), Hane Antje (Van Tinus Claessens), Frans van Fons, Sjang van Tis (Sjang Lenders) en de Softonels d'r oet ómdet anges 't artikel te lank weurdj.

Wae kwome as groep bie-ein, zachte tekste, stökskes, sjreve zelf veul tekste en kwome toet ein programma veur de senioremiddig. Vanoet de Bontje Aovendj kwaam dèk ouch nog ein optraeje en dao wore leedjes. Det waas zoeë ingewikkeldj neet. De Moerebuuk regeldje dèk verleur, zagte waat de entree móst zeen en dao kwaam cake bie. Det ging gewuuuen allemaol.



Oh jao, waat ich ouch nog weit is det ich 'ne fan móst zeen van Tina Turner en David Bowy (Thea Beurskens en de Witte vanne Sjilder). Ich waerdje sjoeën opgemaaktj door Carien Huyskens (die heet waal óngerhalf oor mótte plamure en glaadstriekte) en ich waas zoeëgenaamdj 'ne fan van Tina Turner. Ich weit det Rob van Har van Herme mich saoves vroog: "Nel, maag ich uch desnaovendj neet heiweis bringe?" Dju det vónj ich toen waal sjoeën!

Ich höb Bontje Middige gepresenteerdj, ich höb koffie ingesjödj, ich deej waat móst gebeure.



De Moerebuuk haje de feitelikke organisatie in henj. De entree, de koffie, de cake, 't verleur veur minse die neet zelf koste kómme. Wae haje d'r echt plezier aan. En nog. Want ich doon waat mich gevraogdj weurtj veur de kómmendje Bore Broeloft (op 2 mieërt 2019, 60 jaorig bestaonsfieëst seniorevereiniging in BMV Ellenhof: red). Vanne Moerebuuk kriege wae alles waat wae vraoge. Stefan Bongers en Jan van Elly van Miet zörge veur ós. Höb se nog mieër vraoge? Ich módt dalik gaon, anges bel se mer, dich höbst ós nummer."



## Op 'ne houp



Op maondjig mèt de kermis wore d'r ein paar hieëpe die 't nog neet laat zat vónje óm al heives te gaon. Bie de Prairie waas alles al gepoetst en 't personieël vertrok. Gelökkig waas d'r nog leecht inne aettent, mer ze koste neet mieër bestèlle. Toen höbbe ze de friet vanne bendleje mer opgegaete.

Daonao waas 't toch écht tied óm nao hoes te gaon, 't waas tenslotte al 3 oor. Nell waerdje bie 't opstappe al door heure fiets ómver getrokke. Ouch Jur, dae mèt de 3 hieëpe métging, heel de fiets neet rechtop. 't Lökdje oeteindelijk toch óm op te stappe en dao gingé ze mèt z'n vere richting kermisplein. Nell slalomde verop tösse de obstakels door. Bienao alle hindernisse genómme, keek ze achteróm en zagt: "Wies en Ans, wae kónne ouch nog effe in de botsauto's." Vervolges eine flinke slaag, Nell haaj zich kómplieët vastgereje mèt heur steur op 't strumkestje. Jur ziene fiets veel ouch weer, mer noe van 't lache. Wie Nell zich los haaj gemerteldj, zagt ze: "sorry strumkestje" en gingé ze alle veer veilig en veural röstig nao hoes.



tel. 0495 - 651224 [www.baets.nl](http://www.baets.nl)



## Wisj djer al ...

- det Joeri op 'n fleepje in Swartbrook, veur de zoeëveulste kieér de fietsesleutel kwiet waas
- det 't Terri heure fiets waas en dae most mèt trök
- det hae toen de fiets oppe nek pakdje en zoeë nao Èll leep
- det Joost det zoeë zielig vonj, det t'r ouch de fiets oppe nek pakdje en mèt Joeri mèt aan leep.



## DANKWOORD PRINS WIES

Waat höbbe wae, mien adjudante en ich, eine super sjoeëne vastelaovendj belaefdj. 't Begost mèt 't prinsebal. Waat wore wae benoewdj wie de minse gingé reagere. Die reageerdje GE-WEL-DJIG. Ouch op de prinsereceptie: as se den zuus waat minse mètbringé en tege dich zègge: zoeë hert-verwermendj en zoeë persuuénlik. Kei sjiek óm mèt 3 hoefkerre nao de receptie in Swartbrook te gaon. Op de Bontje Aovendj (los van 't programma) waerdje d'r leedjes gezóngen veur ós en euver ós. Dees waerdje op 't zunjig-aovendjbal ouch nog ins gezóngen. Waat sjoeën. Allebei de optochte wore prachtig en van hoeëg niveau. Waat is d'r veul meugelik mèt miene naam Wies. Den de dinsdigaovendj, "t sloete bie Siem". Wae gingé in polonaise nao binne. Ein en al witte hieëpe pruke. Waat een leuke verrassing! In de gezét versjeen 'n artikel, det waas ein stök groeëter as verwachtj. De reacties hie-op wore te gek. Den dink se det nao de vastelaovendj de reactie op 't prins zeen waal stoptj, mer niks is minder waor. Eder waek, vanaaf 't prinsebal tot noe, höb ich vraoge en opmerkinge gekrege euver 't prinsesjap. Dit is bezunjer en uniek. Zoeë zuus se det de vastelaovendj laeftj. Neet allein mèt die daag, mer 't hieële jaor door. Zeker hie in Èll, get óm trots op te zeen!

Leef minse, bedanktj veur deze sjoeëne en ónvergaetelikke vastelaovendj.

Wae höbbe d'r enorm van genote!

Prins Wies I en de adjudante Jolanda, Chantal en Marian.

## Kwakkerte

Tiejes de zomercarnaval waas 't 'n groeët verkleidfestijn en ederein waas in goje doon. Mer Richard C en Tim B zoge Sander R mèt ein bloodnaas staon. 't Bleek det Sander door eine kikker oppe naas waas getoektj. Behulpzaam as se zeen, gingé de manne op zeuk nao dae kikker in kwestie. Al snel haje ze hum in 't vizier en vloge d'r op aaf. Dae kikker kreeg drek ein nate plekinne bóks en traone inné uig. 't Bleek neet de goje te zeen. Eine viever verder vónje ze de dader. Deze heet de gróndj neet geraaktj tot bie Sander R.

Hie kost d'r "sorry" zègge veur waat d'r gedaon haaj.



bedanktj!



# De Kwakel

**NET NEET BEZEIKTJ**



Rick Maes ging nog ins aojerwets mèt de fiets op stap. In Haalder waas de TT en d'r speuldje ein band. Aangezeen Rick zien maedje oet Haalder kumptj, dacht hae: "Den kan ich dao blieve sloop, ouch al is Rowen ein weekendje wèg." De sjoeënaojers vónje dit prima. Good inne olie lagt Rick zich snachts in béd. Ein paar oor later waerdje de nachtröst van zien sjoeënaojers verstuuerdj. Rick zoot bie sjoeënmoder op béd en dacht ins effe röstig nao de wc te gaon ... Gelökkig greep sjoeënvader net op tied in en heet Rick begeleidj nao de badkamer. Waas dit ein gevalletje 'Rick kan dao op de taofel ... uh... béd sjiete'?

## Hoeëginne bol

Op 't programma sting vasteloaves zunjig 't Eller Leedjes Lalle. De artieste waerdje in de veurgaondje maondje al gevraogdj of ze mèt heure vastelaoves-knaller woeëje optraeje. Lei en Henk wore enthousiast en ouch 't Jeugdcomité woeëj heur biedrage doon. De Hieëpe waerdje ouch gevraogdj of ze 't leedje nog ins woeëje zinge. Zeeë-as wae de Hieëpe kinne, haje ze nogal get noeëte op heure zang. Ze dejé allein mèt as se as headliner oppe poster stinge, ze gael en greune M&M's krege en eine bos mèt gerbera's. Met dees veurwaarde waerdje akkoord gegange, mer einmaol zunjigaovendj, haje de Hieëpe hie neet mieér aan gedacht. Ze wore den ouch verrastj wie ze bedanktj waerdje mét ein kóm gael en greun M&M's en eine bos gerbera's. Neet veul later ging Nicol Orbon heives, want ze waas neet hieëlemaol fit. Wie ze einmaol thoes waas, steurdje ze ein foto óm te laote kieke det ze de gerbera's in 't water haaj gezatte. Bliekbaar haaj de koorts de euverhandj genómme, want Nicol haaj neet inne gate det de bos blome "Hieëp-proof" wore gemaakt, gezeen dit eine bos nep blome woor.



## Waat is 't versjil?

Ruud van Hover steit aan de balie in de kebabtent zien bestëlling door te gaeve. Amy sjrieftj alles op en steltj den bloodserieus de vraog: "Is 't óm mèt te numme of óm aaf te hole?" Waat is 't versjil, Amy?

## Wijjdjer al ...

- det Joyce al op tied nao de vergaderinge van de Moerebuuk geit óm op heur gemaak ein tas thieë te drinke
- det 't heur al twieë kieër gelöktj is, óm dit in de anger café as aafgesproke te doon
- det ze zoeë asnog nog te laat kumptj.



## Aafveur Chinees / 排泄中國人

Gert-Jan en Li höbbe ein sjoeën houte euverkapping gemaaktj.

De Chinese bure haje al hieël get gezaeg en gesjroef mótté verdure en wore blie det 't bienao klaor waas.

Noe koste oma Ha Die Mie en opa Ho Lee Chit zich weer concentrere op de plantage bieslook en boseunje inne hoof. Op 'ne zaoterdig, al smörges oppe tied, kwome de manne van 't platdaak veur de aafwirkung van dees creatie. Bie de aafveur moke de men ein stök piep vast die ein hieël inj bie de bure euverstook. De daakdèkkers haje de groeëtste lol toen d'r eine houp gespoes in 't Chinees ane angere kantj vanne sjötting klónk. Menieër Ho Lee zaag nateurlik ziene hieële ougst bieslook en boseunje verzoope bie de ieëste de bëste bui. En dao kwaakdjie mevrouw nog 'ns flink euverhaer. Dus zoon Ben (vanne friettent) kwoom later toch mer effe verhaol hole. Geine paniek, 't bleek det Gert-Jan de piep nog móst verlègge.

## EINE GLOBETROTTER MÈT LANG OËRE

Hae (of zie?) kost d'r nijs aan doon. As 't baasje de koeëj ope lieëtj staon den liktj de wereldj veur hum ope. Det euverkumtj 't knienke van de vieëartsfamilie Koolen regelmaotig. Dae geit den röstig ane wanjet en kumtj nog 'ns örges. Van Breeven nao de Seringestraot is ein hieël inj huppele zoeëts se zègge, mer toch is 't bieëstje bie Mientje Mertes gesignaleerdj. Is 't det den? Nae minse, det knienke hèltj van grenze opzeuke... en verlègge! Zeeë kost de familie hum 'he kieër gaon ophole bie Loes inne Sebastiaanstraot. Dao waas t'r aan 't speule mèt de hoon Wies! Van Spargelheukske nao de Pannestert, wie is 't meugelik? Jao mer... is 't det den? Dus neet. Weer get later haaj d'r dezelfdj route aafgelagdj en noe vónje ze hum bie de kipperen ane Houtingestraot. Naodet ze hum weer mèt roeëj wengskes opgehooldj haje is 't (veurluiwig) röstig gewore. Mer... tösse 't lëste oetstepke en deze Kwakel zitj Kerstmis...



# De Kwiakel

## Waat 'n vieë

Bie Steuten loupe twieë joekels van hunj op 't erf. Minse die geregeldj 'n rondje Böskes loupe, die höbbe Bikkel en Bor zeker waal 'ns aan die port gezeen. Ze höbbe ouch 'n sjaop. (Gein idee of det ouch 'ne naam heet, mer is waal belangriek veur 't verhaol det ze 'n sjaop höbbe...) Jolanda haaj mèt Bor 'n aafspraak bie de vieëarts en 't leek 't gemèkkelikst óm dao mèt de auto haer te gaon. Dus Jolanda duit de achterklep ope, goeëtj 'n keukske inne auto en is van meining det de hóndj den vaneiges inne auto springtj. Mer Bor haaj 'n anger meining en verzat geine traej! Den mer te voot nao de aafspraak. Noe waas 't de kunst óm Bor boete de port te kriege en Bikkel en 't sjaop binne de port te haoje. 't Waas effe get gemertel, mer toen waas Jolanda d'r klaor veur en begost aan de wanjeling. Wie ze t'r huuegdje van Lemmenhoof waas huuerdje ze geblaat achter zich. Ze keek óm en jaowaal, dao leep 't sjaop mèt Bikkel achter zich aan!!! Mer dju, det waas neet de bedoeling. Bliekaar haaj 't sjaop op 't allerlèste moment de port weer ope gemaaktj door langs de sensor te loupe. Jolanda ging mèt alledrie die bieëste mer weer trök op heives aan. Óngerweeg de vieëarts gebeldj det ze get later kwaam en Wim gebeldj óm te kómme helpe. Wim zat de auto in de achteroet, stapdje oet, deej de achterklep ope en höfdje de hóndj inne auto. Mer ieér Wim bie 't portier waas óm achter 't steur te gaon zitte wanjeldje de hóndj via diezelfde deur de auto weer oet! Wim is toen mer bie de port blieve staon óm Bikkel en 't sjaop tege te haoje, t'r wiel Jolanda den toch mer te voot mèt Bor nao zien aafspraak is geloupe.



## KUNNEKOEL GEUFTJU GAAS

Aafgeloupe jaor waas op 3 juni 't straatfieëst van buurt Kunnekoel. Al vreug waerdje begost mèt 't treffe vanne veurbereidinge. 't Orkest waerdje vastgelagdj en de barbecue besteldj bie de slegter. Om ruum op tied klaor te zeen, begoste ze op woonsdig mèt 't opzette vanne partytent. Roel, Piet en Ton wore 'n aantal eurkes zeut gewaestj mèt 't opzette vanne tent. Mer ze wore neet gans tevreje euver dae tenthieëring bie Twan inne hoof. "Dae houwe wae d'r opnoe in; sjuuns en 'n stök deeper."



*Doen eur veut pieninne sjoen,  
den kóntj gae bie Bep, Jantien of Evi de veut laote doon!*

## Bep van Oosterhout

Medisch pedicure & oncologisch voetzorgverlener

Scheijmansplein 5, Ell / St. Willibrordusstraat 10, Nederweert  
Beltj veur 'n aafspraak nao: 0495 55 23 64 of 06 5435 8227

Wie ze de pin oet de gróndj hooldje, begost 't te sisse... "Ich ruuk gaas!" Mer good det die men zoeë puntje precies zeen en oppe veiligheid lètte. Anges wore ze mesjian pas nao 't straatfieëst d'r achter gekómme det ze de gaasleiding haje geraaktj. De brandjwaer waas snel ter plaatse. De straat en ein deil van 't speultuintje waerdje aafgezatte tot de men van Enexis heur werk haje gedaon. Precies ein waek later, waas 't opnoe raak bie de Kunnekoel. Noe waas 't 'n gaaslek bie emes thoes oppe Seringestraot. Ouch det zörgdje weer veur veul toeters en belle. Ómdet d'r ein waek ieérder ervaring waas opgedaan, waas 't noe 'n kippetje veur de brandjwaer.

## Mysterieus pakketje

Carolien regeldje 't cadeau veur de babyshower van Chrissy. Online besteldje ze ein lekker pakket veur in bad. Wie 't pakket aankwoom, sjrók Carolien toch waal van wat d'r in zoot, dit kost ze toch echt neet aan Chrissy gaeve. Dao zoot namelik eine vibrator in. Haats se dich vergistj in ein lekker pakket veur in bad, of ein pakket veur in béd? Opgebeldj nao de online winkel en dao zoot de fout. Óm 't good te make mocht Carolien allebei de pakkete haoje. Chrissy heet inmiddels 't douchepakket gekrege, mer woeë is det anger pakketje gebleve? Weurtj vervolgdi...



## Wijj djer al ...

- det Lianne Evers bie Hanneke van Berend in 't recreanteteam van Ell volleytj
- det Lianne aan 't vertèlle waas weem d'r allemaal in heur team sitj
- det ze ouch 'Hanneke Berendsen' opnumdje as teamlid.



# De Kwakel

## Döbbel duueske

Paul van Jan van Thei waas gezellig op stap gewaestj mèt Ell-Paaso. Good inne olie kwaam hae thoes, poetsdje zien tenj, veuldjé de matras en veel drek in slaop. Wie Paul tege de middig wakker waerdje, kost t'r zien lens nörjes vinje. "Nondedju, woeë höb ich die toch gelaote?" Det is ein speciaal lens en behuuerlik priezig. Hae zocht euveral, mer ze zaat neet in zien lenzepötje, laag neet oppe badkamer en zaat neet in zien oug. Det dink waas nörjes te vinje. Den mer ein paar daag de bril op en alwéér ein noew hole. Die noew lens waas nog neet binne, wie hae d'r achterkwaam det t'r neet ein, mer twieë lenzepötjes heet.



CV DE MOEREBUUK  
Jaorgank 54



Postnl

## Woeë ls hoesnummer 19 toch?

Pakketbezörger Ruud oet Wieërt, bringt pekskes róndj en móit in Èll get aafgaeve op Scheijmansplein 19. Hae is euveral 2 kieër gewaestj en kan gein hoes mèt nummer 19 vinje. In de foyer van Ellenhof sitte 14 dames te kaarte. Die minse woeëne al jaore in Èll, dus Ruud nao binne en hae vroog óm hulp. Ederein sjeidje oet mèt kaarte en bemeudje d'r zich mèt. "Hie is gein nummer 19." "Jaowaal, mer die vrouw is al 2 jaor doeëd." "Nae, den zoeëj det hoesnummer d'r toch nog móitte zeen?" "Dae jóng van die vrouw mèt die twieë hundjes, waat veur ein nummer heet dae?" En det ging mer door. Eine behulpzame vriewilliger ging mèt dae Ruud nao boete en zeet: "De BMV heet 18, dao naeve kumtj 19. Loup mer mèt mich mèt. En inderdaad, bie Rick steit nummer 19 as hoesnummer. Ruud bëltj aan mer nemes duit ope. Dae vriewilliger zeet: "Ich wil 't pakket waal nao zien aojers bringe." "Det maag ich neet doon, dit is ein geboortepakket. Mesjen wete die aojers nog neet det mevrouw in verwachting is. Ich kóm merge waal trök." As dae vriewilliger trök binne kumtj, kieke de kaarters hum allemaol vraogendj aan. "Dae bezörger móst bie die vriendin van Rick ein geboortepakket aafgaeve, mer hae kumtj mórgje trök, want Jo en Thea wete 't mesjen nog neet".

## Spoor bijster

Jos huurdje neet det ziene telefoon veel. Saoves thoes oppe bank misdje d'r hum pas. "Nellie, höbs dich miene telefoon gezeen?" "Nae, woeë höbs se dae veur 't lèst gadj?" "Desmiddig ben ich gaon kieke wie ze de plastic oppe asperges aan't lèggje wore. Dao höb ich get geholpe. Mesjen is d'r mich toen oet de tes gevallen." Dus Jos ging trök nao 't aspergeveldj en luptj alle rieje nao. Want die bëdde lieke allemaol opein en hae wist neet mieér in welke riej d'r geholpe haaj. Helaas kwaam d'r zónger telefoon weer thoes. "Den gaon we murge inne BMV kieke, dao zal d'r waal ligge." Sangedaags gingé ze same nao de zaal. Nellie probeerdje Jos te belle, inne hoop ziene ringtone te huure. Al bellendjes lepe ze de hieële zaal door. Gelökkig waas Bérke toevallig ouch dao. Hae kwaam mèt 't idee óm de 'zoek-mijn-iPhone-app' aan te zette. Mèt z'n drieje volgdje ze 't signaal op Nellie heur sjerm. "We móttie mieér nao de Scheyvestraot," zeet Bér "kiek mer, dao kumtj 't signaal vanaaf." En wie Bér det zagt, zaag Jos 't leecht. Toen wist t'r weer det hae't aod papeer haaj opgeruumdj in de berging (aoje ingang gymzaal, red). En jaowaal, dao laag Jos ziene telefoon.

## Wijj djer al ...

GEHEIM

- det 't Kindervakantiewerk eder jaor ein thema verzintj veur de activiteite inne KVW-waek
- det aafgeloupe jaor alles in 't teiken: " 't geheim van KVW" sting
- det völ wichter 't neet snapdje en 't mer flauw vónje det 't KVW heur thema geheim woeëj haoje.



## Waat gebeurtj d'r op dees foto

- A) Opnames 'Boor zeuktj Klara' van start
- B) De kuujsmiespelieér
- C) Kus mich, den waer ich dien prinses
- D) Koe kan 't neet mieér aanzeen



*Jeugdprins Kris & jeugdprinses Rose*

Ich, jeugdprins Kris  
Zoon van Rob van Harie van Herme en Mia van Susse Bèr en  
Francien van Giel van Hoeëger en Lies vanne Vosberg,

*Wille uch 't volgendje laote wete:*

Ich wil gaer as jeugdprins, same mèt jeugdprinses Rose en 't groeëte prinsepaar, dit jaor veurop gaon mèt de vastelaovendj in 't Moeërelandj. Same mèt mien aojers en zösters Merijn en Veerle zette wae hieveur drie daag alles ane kantj. Op 10 november bén ich as Serdelundje gebore, 2 jaor later bén ich ein Moerebuukske gewore. Bie ós pap inne loeëds höb ich al völ sjoen vastelaoveswages zeen óntstaon, die bie mich van kleins aaf aan, mien vastelaoveshertje sneller lete slaon. As keeper bie de voetbalclub staon ichinne goal en duik ich nao de bal. Mèt de sjuuftrómbone maak ich bie de jeugdfanfaar muziek, en lol bovenal. Mien opa en vader opene mèt de fanfaar de groeëte optocht, al zoeë lang ich bestaan, mèt muziek. Dit jaor riej ichinne jeugdprinsegewage d'r vlak achter, det vinj ich kei sjiek. Sinds groep vief höb ich mèt Max, miene adjudant, aafgesproke det as ich prins zooj waere, hae miene adjudant zooj zeen, en ouch anges t'r óm. Det dit noe ouch echt gebeurtj, vinj ich keigaaf. Max, same mèt dich make we deze vastelaovendj hieëlemaol aaf!

*Milan en Noor, bedanktjy veur die knallendje vastelaovendj, waat waas dae sjoe  n.*

*Wae numme 't noe dansendj van uch euver, op eine swingendje toeën.*

In de orde van " 't speakerke" winse wae uch 'ne super sjoeëne vastelaovendj ónger ós motto:

**Mèt 'ne vètte beat en coole move,  
Gaeve wae deze Vastelaovendj ónze eige 'groove'!**

# WINNENDJ LEEDJE 2018/2019

Jao kóm, wae gaon same get vere  
Mer jao, zing mèt ós mèt  
Jao kom, ich weit ein plaats om te fieëste  
En ich zèk, dootj mèt ós mèt  
dootj met ós mèt

Wae gaon noe draan, de zaal geit los  
De hendjes hoeëg, en paktj uch vast  
En zinge; damdamdam ...

Kiek dao, ze danse wie gekke  
En zeen, bie lange neet meug  
Kiek dao, de zaal steit te springe  
En gaon neet, nog lang neet nao hoes  
nog lang neet nao hoes

Wae gaon noe draan, de zaal geit los  
De hendjes hoeëg, en paktj uch vast  
En zinge: damdamdam ...  
damdamdam ...

Ich, jeugdprinses Rose  
Dochter van Johan Heijkers van Gerard van Jannese Bèr en  
Maud Ramakers van Bert van Klómpe Graatje.

Ich bèn hieël erg trots det ich hie mèt jeugdprins Kris en 't groeëte prinsepaar moog staon, jeugdprinses vanne Moerebuuk, det kos ich echt neet aafslaon. Ich bèn op 7 februari in Èll op de Hoeëgstraot gebore, en dao bèn ich ouch jeugd-prinses gewore. Tösse de kuuj, de appele enne paere, dao kóns se mich heerlik laote gewaere. Danse is mien groeëstste passie, ich dans de hieële daag. Allein neet as ich bie de vechtsport bèn, ómdet det dao neet maag. Mien opa, aod-prins Bert 1e ging mich al veur, dae goof bie de Serdelunj de vastelaovendj kleur. Nao mien tante Ilja as aod-jeugdprinses, is de ieër aan mich, veur ein volgendj vastelaovessucces! Wae zeen al sinds jóngs aaf aan bie-ein, Benthe, as mien adjudante, det vinj ich super fijn. Kris, Max, Benthe en de Jeugdraad ... Jaore wore wae de Dummies, door rèngel, snieë en storm.

Det wae dit noe same doon, det waardeer ich echt enorm.



Wae gaon noe draan, de zaal geit los  
De hendjes hoeëg, paktj uch vast  
En zinge: damdamdam ...  
damdamdam ... damdamdam ...

Damdamdam Damdam dam  
Dadadadadadadadadadam

# LEI & HENK

## WAE CAON NOE DRAAN



## WEURDJE VANNE REDACTIE,

Ein jaor is zoeë óm, veurdet se 't inne gate höbst, zits se mèt 't Kwakel-comité weer bie-ein. De gebeurtenisse van de veurige waek, die wètj ederein nog. En sóms hoofs se mer eine naam te numme of dao zeen alweer 3 verhaole. As se neet allein mer euver Siem of Carolien en Steef wilst sjrieve en anger verhaole ein kans wilst gaeve, jeh, den weurtj 't aanpote. Wae höbbe ós weer hieël gegaeve. Wae höbbe 't gaer gedaon, want 't waas dèk lache. Hopelik kóntj gae det ouch. Laot mer huuere, wat gae d'r van vintj.

Bram Camp, Lieke Gerris, Rianne Goldenbeld,  
Anouk Kessels, Jos van Lemme, Paul van Miet,  
Nicol Orbon en Daniëlle van Tien.



Slagerij Ruud & Marleen Heijkers

Hét adres voor  
koude & warme buffetten en barbecue's compleet  
Sebastiaanstraat 19 Ell tel. 0495-551242  
[www.slagerijheijkers.nl](http://www.slagerijheijkers.nl)



Thijs Koolen  
Beste Echte Bakker  
van Nederland

Cafetaria Eltaria

Garage Heemels

EETCAFE  
DE PRAIRIE  
RESTAURANT | ZAAL | CATERING

Spraakmakende begeleiding bij  
Logopediepraktijk Eva Strous

